

光緒山西通志

鄉賢錄十二

錄二之十二

山西通志弟百二十七

賜進士出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

元

郝巴圖

本作拔都

太原人善騎射通譯語太祖遣使宋往返數四

以辨稱從侵宋以功拜宣德等五路萬戶後還治太原凡遠道租稅過重者悉除之卒追封冀國公子天益天舉天澤皆至總管

張德輝字蠟卿冀甯交城人少力學數舉於鄉及北渡史天澤辟經歷官從南征時軍士逃者必戮德輝言太過止配令穴城光州下韋山民結寨德輝曰鄉民爲自保計當曉以禍福果相繼來降世祖在潛邸召見問曰孔子沒已久今其性

安在對曰聖人與天地終始無往不在殿下能行聖人之道
性卽在是矣又問或云遼以釋廢金以儒亡有諸對曰遼事
臣未敢知金季乃所親睹宰執皆武弁世爵間用一二儒臣
及論軍國大計又不使預聞大抵以儒進者三十之一然則
金之淪亡自有任其咎者儒何與焉又問祖宗法度德輝指
銀槃喻曰當求謹厚者司掌乃永爲實用又問農家對曰農
桑天下之本衣食所從出今男耕女織終歲勤苦而親民之
吏復橫斂以盡之則民鮮有不凍餒者矣問孔子廟食禮對
曰尊崇與否於聖人無所損益特以見時君崇儒重道之意
耳又問典兵宰民對曰莫如更遣宗室之賢如昆布哈本作
山溫
花本作
忽者使主民政則天下
均受賜矣及將還又陳先務七事曰敦孝友擇人才察下情

貴兼聽親君子信賞罰節用度切直多所開悟尋與元裕之
北觀請世祖爲儒教大宗師世祖悅受之因啟累朝有旨蠲
儒戶兵賦卽令行之仍命提調正定學校世祖初命宣撫河
東擊豪強黜賊吏均賦役耄耄不遠千里來謁曰六十年不
復見此太平官府矣河東徭役官吏率賦一征十乃閱實戶
編均其等第出納有法汾晉地廣官世守吏結爲朋黨得姦
賊尤甚者數十人械庭下數其罪惡杖出之所部肅然考績
爲十路最陞見命疏所急務條四事曰嚴保舉以取人財給
俸祿以養廉吏易世官而遷都邑正刑罰而勿屢赦帝嘉納
焉遷東平路宣慰使奏免遠輸豆粟二十萬斛和糶粟十萬
斛同知寶合丁議官賦重絲令民稅而後輸德輝曰是誣上
以毒下也且輸納後期之責孰任之遂罷其事宣慰使巴勒

本作議誅盜賊德輝曰吾豈敢曲法從汝妄殺乎至元三年
召參議中書省事或言沿邊將校冒代軍士將遣使按治德
輝奏曰若悉繩以法則人不自安今但易其部署選武毅有
才略者任之則軍政自新委風憲官體究則宿弊自革五年
擢侍御史辭請老命舉任風憲者疏烏古倫眞張邦彥徒單
公履張家張肅李槃張昉曹椿年西方賓周止高逸民王博
文劉郁孫汝楫王惲胡祗通周砥李謙魏初鄭房凡二十人
德輝剛直博學有經濟器性不喜嬉笑與元裕之李治游封
龍山時人號爲龍山三老卒年八十

何榮祖字繼先太原人父瑛金貞祐間試文法入優等補吏
後授明威將軍守鉅鹿尹轄軍器監主事因僞廣平榮祖狀
貌魁偉世業吏遂以吏累遷中書省掾擢御史臺都事始折

節讀書日記數千言阿哈瑪置總庫于其家號曰和市監察御史范方等斥其非阿哈瑪知榮祖主之奏爲左右司都事以隸已未幾御史臺除治書侍御史升侍御史又出爲山東按察使而阿哈瑪不克逞僉事李唐卿劾帖木刺思貪墨遂摭告唐卿縱反者榮祖得其情欲抵告者罪同鞠官議以失口亂言之罪坐之榮祖不可俄還河南按察使卒杖其人唐卿之誣獲白平涼府言南人二十餘輩遁行省欲上聞會榮祖爲參政止之曰何必上聞去者皆人奴今遁往求其家移文召捕之可也已而俱獲泊以本罪其於事明決多類此除雲南行省參知政事以母老辭拜御史中丞復出爲山東東西道按察使時宣慰使樂實姚演開膠州海道糧船遇暴風多漂覆樂實督漕卒償之按察官莫敢言榮祖曰第上奏若

見譴吾自當之卽草辭以奏詔免其徵召入爲尙書參知政

事時僧格

本作桑哥理

筭錢穀榮祖數請罷之不從屢懇請不已

乃稍緩之而畿內民苦尤甚榮祖每以爲辭同僚止之榮祖

執愈堅至忤旨不少屈竟不署其牘未踰月而害民之弊皆

聞上乃思榮祖言召問所宜榮祖請歲終立局考校人以爲

便立爲常式詔賜鈔萬一千貫榮祖條中外百官規程欲矯

時弊僧格抑不爲通榮祖以病告特授集賢大學士尋起爲

尙書右丞僧格敗改中書右丞奏行所定至元新格請改提

刑按察司爲肅政廉訪司立監治法屢以老病乞解詔免署

事惟預議中書而食其祿尋拜昭文館大學士預中書省事

又加平章政事先是定大德律令至是詔元老大臣聚聽之

歸廣平卒年七十九贈光祿大夫大司徒柱國追封趙國公

謚文憲榮祖僦第以居飲器用青瓷杯中宮賜以上尊及金五十兩銀五百兩鈔二萬五千貫俾置器買宅以旌其廉著大畜十集學易記載道集觀物外篇等書子惠祕書少監覃澄交城人行元帥府事資榮子也襲職爲交城令有文谷水分溉交城田汾陽郭帥專其利而堰之澄折以理令決水均利於民請免僑民逋賦能來歸者復三年公私便之歷官陝西四川道提刑按察使兼同知宣慰使封宏農郡公謚忠宣弟山阜代令交城終知東勝州子克修陝西漢中道提刑按察使贈禮部尙書追封宏農郡侯謚文憲克思中山知府上駉都尉封宏農郡侯山阜子克柔通使舍人克修子忠以南洛尹遷保德州同知陞南康府判次質兵部侍郎次文河南省宣慰使克思子敬漢陽知府

齊喇

本作性烈

西域人世居太原由中書驛史從賽音諤德齊

本作

賽典赤

爲雲南行省幕官諸洞款附賞頒詔於緬緬王積額仕

至資善大夫雲南行中書省左丞大德四年卒

郝佑字君轉小字朶魯別台由宿衛補官仁宗時拜殿中侍御史以廉直著名被知遇遷陝西行省參知政事拜陝西行御史臺侍御史子忠恕翰林侍制獻所著無逸圖命總裁宋遼金三史成歸隱終身

王守誠字君實太原陽曲人氣宇和粹性好學從鄧文原虞集游文辭日進泰定元年試禮部第一賜同進士出身授祕書郎遷太常博士續編太常集禮若干卷轉藝林庫使與著經世大典拜陝西行臺監察御史除奎章閣鑒書博士拜監察御史僉山東廉訪司事改戶部員外郎中書右司郎中拜

禮部尙書與修遼金宋三史書成擢參議中書省事調燕南
廉訪使至正五年除河南行省參知政事時銅梁縣尹張文
德捕殺賊百餘人重慶府官以私怨使縣吏誣之擬杖一百
守誠爲直其事辨析賊訟多所平反釐正職田因疏言仕於
蜀者地僻路遙俸給薄何以自養請以戶絕及屯田荒者召
人耕種收其入以增祿秩宜賓縣尹楊濟亨欲於蟠龍山建
憲宗神御殿儒學提舉謝晉賢請復文翁石室爲書院皆采
以上聞成之風采聳動居諸道最進資政大夫河南行省左
丞末上母喪遭疾至正九年卒年五十四賜鈔萬緡謚文昭
有文集若干卷

劉濬字濟川興州人金狀元海曾孫廉訪司書吏調連江縣
甯善鄉巡檢至正十三年江西賊帥王善寇閩官軍守羅源

縣與連江接壤濬妻正定史氏故相家女有才識謂濬曰事急矣可聚兵以捍一方於是盡出匭中物募壯士百餘命仲子健將之決旬間眾至數萬賊尋破羅源分兩道攻福州濬拒之辰山三戰三捷俄福州陷眾多潰濬獨帥健兵進遇賊於中麻突其陣斬前鋒五人賊兵大至鏖戰三時頃濬中箭墮馬健下馬掖之背被獲濬戟手大罵賊縛濬階下先斫手一指罵彌厲再斫一指亦如之指且盡斫兩腕次及兩足濬色不少變罵聲猶不絕遂割其喉舌而死健亦以死拒賊黨義之舍健使斂濬尸健歸請兵於帥以復讎弗聽健盡散家貲結死士百人詐爲工商流丐入賊中夜半發火大譟賊驚擾自相屠戮健手斬殺父者張破四并擒善及寇首陳伯祥來獻磔之贈濬福建行省檢校官授健古田縣尹官爲濬立

祠福州北門外歲時致祭

武祺太谷人以儒進歷知安慶路桐城縣事發奸摘伏果斷如神淮西廉訪司與安慶路交章舉薦歷省部臺二十餘年官至甘肅行省參政妻王氏罵寇死節

以上太原府

許國貞字進之絳州曲沃人祖濟金絳州節度使父曰嚴榮州節度判官皆業醫國貞博通經史尤精醫術金季避永甯後歸寓太原世祖在潛邸以醫徵至瀚海留掌醫藥治莊聖太后刻期而愈迺張宴賜坐太后時年五十三遂以白金錠如年數賜之嘗進藥味苦卻不服國貞曰古人有言良藥苦口利於病忠言逆耳利於行已而復召入視對曰良藥苦口既知之矣忠言逆耳願留意焉世祖大悅以七寶馬鞍賜之憲宗三年從征雲南機密皆得參與朝夕未嘗離左右九年

世祖圍鄆獲數百族諸將欲盡阬之國貞力請止誅其凶暴餘皆獲免及師還降民數十萬口顛仆滿道國貞白賑之全活甚衆世祖卽位授榮祿大夫提點太醫院事賜金符累遷禮部尙書嘗疏言慎財賦禁服色明法律嚴武備設諫官均衛兵建學校立朝儀事多施行凡薦引皆知名士士歸重之上嘗曰朕昔出征同履艱難者惟卿數人在爾遂拜集賢大學士進階光祿大夫每進見上呼許光祿而不名由是諸王大臣皆呼許光祿升翰林集賢大學士卒年七十六時大臣罕得贈謚特贈金紫光祿大夫謚忠憲後加贈推誠廣德協恭翊亮功臣翰林學士承旨上柱國追封荊國公初國貞母韓氏亦以能醫侍莊憲太后又善調和食味稱旨凡珍膳旨酒皆命掌之太后閱其勞賜以正定宅一區歲給衣廩終身

國貞由是家焉

許展字君勳一名知爾果斯

本作魯火孫

國貞子從父事潛邸進

退莊重世祖喜之賜今名俾從許衡學入備宿衛忠慎小心

除禮部尙書提點太醫院事賜日月龍鳳紋綺衣二襲每外

國使至必命與語辭理明辨莫不傾服改尙醫大監帝命畫

工寫其像賜之轉正議大夫仍提點太醫院事有竊大安閣

禮神幣者將誅之展諫曰敬神善事也因置人于死地恐神

不享卽命釋之與丞相安圖

本作安童

善多所贊益僧格

本作桑哥

而請之上不之信僧格敗繫左掖門命往唾其面辭不可上

稱其仁厚賜以白玉帶且諭之曰以汝明潔無瑕有類此玉

故以賜汝也成宗初遷中書右丞行太常卿力辭乃命以中

書右丞署太常事俄改陝西行中書省右丞關中饑議賑展

曰若俟命下無及矣擅發之罪吾當獨任之遂大發粟命亦
尋下明年旱禱終南山而雨歲以大熟民皆畫像祀之屢不
事生業田宅皆上賜有足疾不能行仁宗以爲先朝老臣特
敕乘小輿入禁中後國有大政詔使近侍卽其家問之特授
榮祿大夫大司徒食其俸終身卒贈推忠守正佐理功臣光
祿大夫陝西等處行中書省平章政事柱國追封趙國公謚
僖簡

高源字仲淵晉州人父汝霖爲正定照磨使東平道經高唐
遇盜死源幼與母依及長補縣吏世祖中統初累擢江南浙
西道僉事常州路達魯噶齊馬忽奪民田源劾其不法恕懼
賂權臣阿哈瑪誣以他事繫獄久之忽釋源其知所由先時
源所居里多阿哈瑪姻戚素知源事母孝至是聞源坐非辜

悉詣闕白曰源孝子也天必知之況媒孽之罪非實若妄殺源悖天不祥由是得不死後遷都水監開通惠河由文明門東七十里與通惠河接置牖土橋十二至今人蒙其利

楊宜時元孫形貌魁碩有識慮值貞祐之變金主南渡河北郡縣多沒兵凶相仍寇賊充斥宜暨從弟琛仁海義姪紹先茂先帥鄉黨族屬約束自守及元兵來畧地遂以眾歸之拔於行間超陞行大元帥府鎮翼城授忠勇校尉佩銀符守平陽四門主管義軍時青龍鰲背葛伯彈平諸砦未降互出攻擊肆爲剽劫宜暨琛等悉平之民賴以安及塔海都元帥西征庸蜀辟琛爲先鋒宜與焉凡所攻拔不避矢石凱還以勞遂授今職宜爲治不事表襮不任刑罰作事必爲遠計使人守其成法縣之東山炭窟年歲旣久穿廡益深屢有圯壓之

忠宣相視其地創爲開置民甚便之南川水利溉田甚廣數
村爭訟不已宜爲斷理皆服其平至今以爲定例民立祠祀
之所任凡三十餘年無少玷闕至元元年卒子三汝直襲職
汝舟授本縣丞俱有能名汝霖隱德不仕延祐三年春祀名
宦段天章表其墓

楊琛翼城人初名俊與從兄宜平諸賊砦以功行翼州元帥
事金人執虎符白麻招之俊戮使者以聞特降金符爲征行
元帥取河中興元與塔海下蜀淮全活數萬口從車駕攻河
南破蔡州宣授千夫長佩金符賜名琛

楊思忠翼城人全子爲本縣軍民長官愛民如子民非有大
過不加箠楚徭役賦稅皆有成例至元二年遷聞喜父老攀
轅泣送者千餘人

閻復字子靖其先平陽和川人祖衍仕金沒於王事父忠僑
高唐州復始生有奇光照室及長性簡重美丰儀弱冠入東
平學師事名儒康疇時嚴實延元好問校諸生肄進士業入
選者四人復爲首徐掞李謙孟祺次焉初掌行臺書記至元
八年王磐薦爲翰林應奉充會同館副使兼接伴使扈駕上
京賦應制詩一篇寓規諷意世祖顧之喜曰有才如此何可
不用十四年出僉河北道事尋召還遷翰林直學士建議定
銓選校官法上屢命至榻前面授詔旨每具草進悉曲當上
意立尙書省召復入便殿問曰朕欲命卿執政何如復謝不
足勝任上謂侍臣曰書生識義理存謙讓是也勿強尋以撰
僧格輔政碑免成宗立復除集賢學士賜重錦玉環白金撰
曲阜廟碑疏言京師宜首建宣聖廟學定釋奠雅樂曲阜林

廟戶不宜聽有司併入民籍其後賜孔林灑掃二十八戶祀田五千畝皆復之請也大德三年彗星見疏言定律令頒封贈增俸給通調內外官且曰古者刑不上大夫今郡守之貴以徵租受杖非所以厲廉隅江南公田租太重宜減以貸貧民多采用之上嘗召問曰左相難得人卿爲朕舉所知復以哈刺哈孫對上大喜卽命入相復亦拜翰林學士承旨武宗初首陳三事曰惜名器明賞罰擇人材詞皆愷切遙授平章政事力辭不許尋乞骸骨詔給半俸終養卒年七十七謚文康有靖軒集五十卷傳於世

張翥字仲舉晉甯人父爲杭州鈔庫副使因家焉翥少負才豪放不羈一旦翻然謝客閉門讀書晝夜不輟從李存家安仁學古文辭又從仇遠學詩遂以詩文鳴於時後至元末同

郡傳起巖居中書薦翥隱逸授國子助教分教上都生修宋
遼金三史爲國史院編修官史成厯應奉修撰累遷太常博
士翰林侍講學士兼祭酒勤於誘掖論辨輒雜以談笑各厭
其所得嘗詣中書議時政眾論議起翥獨默丞相撝思監問
之對曰諸人議皆是但事勢有緩急施行有先後耳以翰林
學士承旨致仕博囉特穆爾本作字羅帖木兒入都強翥草詔削奪
庫庫特穆爾本作擴廓帖木兒官爵且發兵致討翥不從曰吾臂可
斷筆不能操也博囉誅詔爲河南平章仍翰林承旨致仕給
全俸終身卒年八十二翥長於詩近體長短句尤工今傳蛻
庵樂府三卷又嘗著忠義錄

靳用字祐之曲沃人和子六歲從事性理之學壯爲曲沃翼
城令有聲改榮河尹奉法循理勸農興學拜監察御史陝西

漢中道按察司僉事擢嶺北湖南道肅政廉訪使臨民以德
執法不阿所在頌之終朝列大夫晉甯路總管子德政邳州
判官德信將仕郎德謙禁直宿衛德淵贈兵部尚書封西河
郡侯德昌好學善屬文德淵子榮監察御史奎章閣待制學
士剛直有祖風弟昂有孝行

牛光祖襄陵人以才辟甘肅行省掾尋升中書省掾中都留
守司都事有幹局以廉慎稱遷刑部主事天厯間累官河東
陝西都轉鹽運使雲南諸路行中書省參知政事致仕卒

李謙亨曲沃人至治中以儒士辟厯內臺御史時建西山佛
寺甚亟謙亨以歲饑且東作方興上疏極諫帝怒謫邊陲尋
召還授浙東海右二道廉訪使卒諡忠肅

以上平
陽府

謝天吉字鍾祥元初知河中嘗因朝覲賜坐賜金甲彤弓良

馬紹裘金末人皆逃難河南天吉以王事持節至流民相謂
謝帥素寬仁能容來附者數千人初遭上官徵歛無度輒發
家貲以應踰年徵益迫天吉以民困家竭計窮乃投河佯死
事得寢時經大變河中又聞河戎馬之區府僚故吏相對歔
歔曰若謝帥在事不至此或曰謝帥實在向之死僞也諸同
僚就謁於所隱既見悲喜交集懇求莅事再三後可百姓歡
喜載道天吉善談笑好飲酒以含醉養於萬固精舍歸卒於
家年五十九今子孫居崑山前東莊村稱巨族焉

陳元凱字時舉膺子擢明經性英毅有操行事父母以孝聞
至元間太保劉秉忠薦舉扈從上都歷建康路總管浙東海
右道肅政廉訪使以疾終贈河東郡侯諡靖宣

劉哈刺巴圖魯河東人本姓劉氏世業醫至元八年以近臣

言得召見世祖謂其目有火光異之留侍左右初賜名哈刺

鄂托克齊

本作哈刺
翰脫赤

十七年擢太醫院管勾宗王別里特穆

爾往征昔里吉上問曰當行者多避事汝善醫復習騎射能
從行乎曰事君不辭難臣不行將何爲卽請授甲上曰汝安
用甲曰臣願備一戰上上曰醫汝事也甲不可得惟賜以環
刀弓矢將行聞母疾歸省不敢以遠役告母微知之謂曰汝
第行我疾安矣卽辭去馳至王所及將戰請甲王留之使領
輜重慨然曰大丈夫當効命行陣乃守營帳如婦人耶見有
甲者飲以酒高價取之明日披以往曰一人興善萬人可激
我爲萬人激耳中道三遇敵射之皆不中王喜甚旣擒昔里
吉命獻俘上徹御膳羊截以賜旣拜受先懷其美者上問故
對曰請以遺母命自今凡賜之食必先賜其母以功授和林

等處宣慰副使二十五年哈圖

本作海都

犯邊尙書省奏以奇卜

本作世伯

往掌和林屯糧上日出納非奇卜所知哈刺鄂托克齊

可任遂使奇卜與俱會哈圖兵至與奇卜南行至巴爾布拉地距敵軍五六十里奇卜大懼劉哈刺見其有二心遂潛遁入見上喜曰人言汝陷賊乃能來耶二十七年遷河東山西道宣慰使奏曰河東臣鄉乞賜錦衣爲榮上以金織文衣賜之居二年召還諭曰阿巴拉烏蘇

本作阿八剌忽素

產魚吾今立城

名肇州汝往爲宣慰使仍別賜汝名曰小龍兒或曰哈刺巴圖魯汝可自擇對曰龍非臣下所敢承上曰然則哈刺巴圖魯可也復賜以繡衣玉帶既至定市里安民居一日得魚九皆千斤遣使來獻俄召還成宗初皇太后命曰東方汝嘗鎮之今以屬汝乃以爲咸平宣慰使元貞元年召爲御史中丞

道卒

敬儼字威卿河東人後徙易水曾祖子淵樂陵令祖鑑同知
嵩州事皆以進士起家父元長太常博士儼幼嗜學御史中
丞郭良弼薦爲殿中知班著章憲若干卷選充中書省掾朱
清張瑄爲海運萬戶儼適典其文牘致厚賂拒之後二人誅
儼獨無所與大德七年拜監察御史江浙省與浙西憲交訐
命與省臣阿思蘭哈雅偕往治兩議上朝廷卒是儼議至大
初擢南臺治書侍御史議立尙書省不便忤宰臣意左遷兩
淮鹽運轉運使陰欲陷之儼黜貪理敝課復增羨河南省將
以羨數爲歲額儼謂病民爲已非大臣體遂止仁宗初爲戶
部尙書言遠罷錢不用恐細民失利不從以疾辭皇慶二年
除南臺侍御史不赴明年召爲侍御史延祐五年拜中書參

知政事諸院寺監奏除僚屬富民多賂進儼奏請悉追奪著
爲令明年謝病歸泰定四年徵爲集賢大學士商議中書省
事帝親爲差吉日使視事命朝會無下拜旋進平章政事復
以老辭不從天歷改元廷議欲盡戮上都朝臣儼抗言若輩
皆循歲例扈行殺之非罪眾賴以免居月餘告歸猶玩書不
輟臨終戒子弟當守恒業無急仕進正冠幘端坐而逝加封
魯國公謚文忠叔祖鉉金進士元初爲中都提學著春秋備
忘四十卷仁宗命刻其書行世

王恩河中人知識明達勇力過人金末避亂鄜州元兵南下
率眾歸隸皇四子麾下遂命總歸附之眾凡遇攻戰屢有奇
功授都元帥年九十三而終祀鄉賢

張克寬蒲州人以儒進拜南臺御史歷晉甯路總管所至有

異政家中條山下號蒼陵翁同族張鏞至正間爲首陽書院
山長以文學著聲

何約字仲博河中人起家以儒試吏累辟中書掾除吏部主
事歷內臺侍御史出官河南會利川饑蘭陽大水倡議發粟
拯救活者數十萬計持節諸道嚴而不苛泰定天歷間典京
漕運餉及千萬石捍衛有方軍食不乏文宗賜上尊以旌其
勞及遷他官上見其名曰是爲京漕能足吾兵食者擢參西
京行省時伊嚕特穆爾本作月魯
帖木兒授本省平章以才不及辭
上曰有何參政在卿何過慮乎及執憲西臺多所糾劾然爲
用事大臣所訾欲中傷之賴約無所失得免初約母卒父繼
娶李氏有婦德約兄弟五人並仕官方州爭迎李氏就養李
氏母吳九十餘無子李不忍遠去曰若曹欲養母我獨不欲

養母平有知約者將用爲山西廉訪使使得近便於供養會御史大夫缺人乃仍留約進封河東郡公數年乞歸卒歐陽元功爲撰墓碑

裴居敬河中人中統至元間爲宿衛兼王府掾王知其賢加以禮遇隨王府視師北邊有剽禿魯功厯官陝西行臺御史至參政卒居敬常官於蜀蜀宣慰使札法者其祖故爲蜀平章行省居敬謂札法曰先平章惠愛及於土人人是以思之不忘今本道歲遺收其賦者苛取無藝爭逃林谷因而抗拒則殺之與先平章政何異耶札法曰同僚未嘗言及此公以相教某之福也遂召諸土官諭以德意各使自占歲入如期一方甯謐四川運司連敗數任同官爭爲奸利居敬力革其弊守成法朝廷以所入有羨運司官悉加賞擢衆喜曰非裴

公安得此乎雲南職兵民者以梁王作鎮恃勢朋恣貪墨憲
司繩之輒燭詔赦免乃居敬至直前啟梁王王聽信之自是
其屬一守典制無敢肆者居敬好書能詩文有集十卷藏其

家

以上蒲
州府

宋子貞字周臣潞州長子人早好學工詞賦與族兄知柔同
補金太學生有名稱大小宋後東平嚴實用爲詳議官兼提
舉學校汴梁下饑民北徙多方振救全活者以萬計金流寓
士悉引見薦用拔名儒張特立劉肅李昶輩於羈旅間士聞
風而至故東平一時人材盛於他鎮七年爲行臺右司郎中
東平統五十餘城子貞倣前代觀察採訪制命官分三道糾
舉官吏立程式定期會大小始有紀綱將弁占部曲戶謂之
腳寨擅賦役幾四百所令悉歸州縣實子忠濟復請於朝授

參議東平路事勸忠濟首新廟學延前進士康煜王磐爲教
官招生徒數百俾習經藝程試必親臨齊魯儒風一變世祖
南伐召問方畧對曰本朝威武有餘仁德未洽所以拒命者
特畏死耳若已降不殺脅從罔治可傳檄定也世祖善其言
中統初授益都路宣撫使尋拜右三部尙書李璫反命參議
軍前行省事事平上書陳便宜曰官爵人主之柄選法宜盡
歸吏部律令國之紀綱宜早行刊定監司總統一路用非其
才不厭人望乞選公廉有才德者爲之州縣官相傳以世非
法賦歛民窮無告宜遷轉以革其弊又請建國學教胄子敕
州郡提學課試諸生三年一貢舉至元二年與左丞相耶律
鐸行省山東還授翰林學士參議中書省事請改北京行省
爲宣慰司控制東北州郡頒俸祿定職田並從之拜中書平

章政事帝悔用子貞晚及以老求退帝曰卿氣力未衰勉措
置大事俟百司差有條理聽卿自便三年十一月懇辭乃得
請敕中書大政卽其家訪問子貞每聞朝廷事不便必封疏
上奏卒年八十一

宋衛字宏道潞州長子人金兵部員外郎元吉孫善記誦屏
居河內者十餘年趙壁經略河南以禮聘至中統三年授翰
林修撰又從壁濟南襄陽多贊大計爲征東行省員外郎持
詔往高麗徙江華島居民於平壤歸復命賜勞良厚遷太常
少卿兼領籍田署事太子珍本戡真金以耆德召見應對詳雅
命擇可備顧問者舉郭祐何瑋徐揆馬紹楊居寬何榮祖楊
仁風等太子曰盡爲我致之除祕書監太子以江西分地命
衛銓舉守令初立詹事院首以衛爲太子賓客卒有柘山集

十卷

劉宣字伯宣潞人金末徙太原幼喜讀書慨然有澄清志宣撫使張德輝器重之薦爲中書省掾暇則往從祭酒許衡講明理學初爲河北河南道勸農副使至元中以丞相安國薦超拜吏部尙書世祖將伐交趾宣上言諫及再征日本又力言之上納其言二十五年出集賢學士除南臺御史中丞時江浙行省丞相孟古台本作忙古歹悍戾縱恣慮臺臣發其奸而忌宣尤甚日遺其黨赴建康伺隙臺班皆求自解惟宣屹不爲動孟古台因羅織宣子逮繫揚州獄又令建康酒務淘金等官誣告行臺沮壞錢穀遣行省鞠狀宣及御史六人胥逮旣登舟行省以軍船列兵衛驅迫之宣不勝憤遂自刎船中始宣將行時以一緘付從子自誠令勿啓及死視其書云觸

怒大臣誣構成罪豈能與經斷小人交口辨訟屈膝爲容於
怨家之前身爲臺臣義不受辱當自引決但不獲以身殉國
爲恨且別有遺藁具言孟古台罪狀塗注勾抹辭句難辨前
治書侍御史霍肅爲敘次其文讀者悲惋宣旣死行省言罪
重自殺前後構成其事卽中張斯立也延祐四年從子自持
上宣行實御史臺以聞追封彭城郡公謚忠憲

李孟字道復潞州上黨人祖昌祈本州宣撫使父唐厯仕秦
蜀僑居漢中孟生而敏悟七歲能文通貫經史授徒於家遠
近爭從之世祖時省臺辟薦皆不就成宗初遣往陝西採訪
先朝聖政備史館紀述孟討論編次以進時武仁二宗將出
閣求名儒輔導有薦者曰布衣李孟有宰相才宜令爲太子
師大德初武宗撫軍北方孟侍仁宗於宮中進講多所裨益

及仁宗侍母居懷孟又如官山孟常單騎從在懷州四年每
進言堯舜之道惟孝弟今大兄在朔方大母有居外之憂殿
下當奉迎意旨以娛樂之則孝弟之道皆得矣及安西王阿
南達之潛謀也丞相哈刺哈斯密使來告仁宗疑未行孟曰
支子不嗣世祖典訓今太子遠在萬里宗廟社稷危疑之秋
殿下當奉大母急還都以折奸謀固人心不則國家安危未
可測仁宗猶豫未定孟復進曰倘邪謀得成以一紙書召還
則母子且不克保何論宗社仁宗愾然乃奉母后還大都時
哈刺哈斯稱病堅臥仁宗遣孟往問計既知安西謀立有日
還告曰事急矣先發者制人後卽爲人所制左右疑懼未敢
發皆曰俟大兄至徐圖之未晚孟曰羣邪違棄祖訓欲立庶
子倘安西旣正位號縱太子至彼豈甘退就藩服如是則宗

社危矣仁宗曰當以卜決之孟召卜者使以吉告筮遇乾之
睽占大吉孟曰筮不違人仁宗起眾翼之上馬孟及諸臣皆
步從入自延春門哈刺哈斯自東掖來就見至殿廊收首謀
及同惡者悉送獄奉璽北迎武宗中外帖然仁宗監國使孟
參知政事規畫庶務羣小多不樂旣事定言於仁宗曰執政
大臣當自天子親用今鑾輿在道孟未見顏色不敢冒大任
固辭弗許遂逃去不知所之武宗初或譏孟當內難初定時
嘗勸仁宗自取上察其誣弗聽仁宗爲皇太子侍內宴飲半
忽戚然改容上顧語曰吾弟何故不樂對曰賴天祖之靈神
器有歸然成今日母子兄弟之歡者李道復之功爲多適有
所思不自知其見於色耳上感其言命搜訪之得於許昌陘
山召見玉德殿上指謂宰臣曰此皇祖妣命爲朕賓師者特

授中書平章政事同知樞密院事仁宗初眞拜平章政事
以國事爲已任見當時賜與太廣名爵太濫風俗太僭擬
言人君之柄在刑與賞刑不足懲賞不足勸何以爲治司空
司徒太尉古之三公也自大德以來封拜繁多冒濫不可計
數釋老二教設官統治權抗有司撓亂政事僧道尤苦其擬
並宜汰罷尋兼領國子學賜爵秦國公上親授之印又圖其
像敕詞臣爲贊且御書秋谷二字賜之入見必坐語移時嘗
賜錢十萬貫令將作監治第孟曰臣布衣際遇非望富貴也
辭不受更以樽節財用爲請上納其言罷諸營繕皇慶初請
告歸葬事訖入朝慰勞甚至因屢請解政務乃命以平章政
事議中書省事又三表乞還國公印始允上每與論用人之
方孟曰人材所出固非一途然漢唐宋金科舉得人爲盛今

欲興天下之賢能以科舉取之猶勝於他途進者然必先德行經術而後文辭乃可得真材也上決意行之延祐改元復拜平章政事改封韓國公又堅乞致政上不得已許之英宗初特們德爾本作鐵木迭兒以孟素不附已搆之奪其前後封拜制命左遷集賢侍講學士欲因其不屑害之孟拜命欣然入院宣徽使以聞曰李孟今日供職例當賜酒上愕然曰李道復乃肯俯就集賢邪由是讒者不得入至治元年卒御史交章辨其誣詔復原官進封魏國公諡文忠孟三入中書退居一室蕭然如布衣凡獻納謀議常自毀其稿子獻官御史中丞尙氣節著述多行世

靳祥潞州人僞大名師事陵川郝溫兼善星厯金末失母母悲泣而盲祥訪得之舐其目百日復明人稱其孝劉敏行省

燕京辟冀幕下無辜者多賴以免卒謚安靖

嘉彬字仲文潞州人父兆平金有功授平陽太原等處都達
魯噶齊彬累擢內臺御史糾平章阿哈瑪受賄事旌彬直言
遷內臺治書進刑部尙書轉正議大夫僉湖廣行中書省事
卒追封京兆郡侯

王利用字國寶潞人大德初爲安西興元兩路總管減職田
租額站戶之役於他郡者悉除之民甚便焉有婦毒殺其夫
問所從來吏教婦指爲富商所貨利用曰家富而貨毒藥豈
人情哉訊之果寃

秦起宗字元卿上黨人僑深水曾大父當金季竅山麓爲洞
奉親以居傍竅大洞厓里中百人閉之具牛酒出待兵兵入
見親屬曰孝子也遂去里人曰秦父生我起宗生長兵間學

書無從得紙父順削柳爲簡寫授之成誦削去更書年十七
蒙古字學成辟武衛驛史御史中丞塔察爾愛其才遷中臺
史持文嚴密無所泄仁宗初轉中書史累遷太子家令司典
簿官上言東宮官屬輔導德義財賦非所治也朝廷是之遷
南臺御史建康多水微行檢災得實人以爲神明文宗初拜
中臺御史劾中丞和尚不報起宗從臺官入見踞辨久之敕
令起起宗不起會日暮出明日有赦起宗又奏不罪和尚無
以正國法和尙服辜上曰爲御史當如是矣元會賜伊遜服
令得與大宴又劾闕縣布札爾流之嶺南盡言無諱皆見聽
用有御史奏議一卷遷都漕運使上召諭遣之又爲撫州路
總管供張甚盛問其費所從出小吏曰借辦於民遂亟使歸
之几席僅給而已因論罷曰我素農家安儉約庶使民化之

居一歲請老以兵部尙書致仕卒謚昭肅子四鈞西臺御史
鑄延微寺經歷銓都省掾鐸蚤卒

王伯淵字嘉甫壺關人性謹恪廉靜有爲少充宿衛選歷官
會福院判至治二年以母老棄職就養母沒後優游里社日
與昆季及耆老相過從怡然自得識者羨之後至元三年十
二月以疾卒年七十有八儒士李景文爲之志

靳克忠字唐臣潞州人通經術精吏治累官西臺御史後知
河中府天歷元年陝西兵起從大慶關渡河克忠不從具公
服坐廳事遇害贈陝西行臺參知政事謚忠愍子文用蔭擢
西臺御史除福建行省參政

靳泌潞州人擢中書天歷間陝西大歉泌奉命載楮幣六萬
以振分給均平元統乙亥遼陽大熟泌奉符平糶計入粟八

十萬斛民不擾而國用饒

李維馨字庭芳潞州人質敏好學有經濟才江淮兵起托克

托

本作脫

請爲幕扼要鋤強止殺遂平禍亂丁父憂值曹濮盜

橫行鄉民奔竄惟馨率眾憑險伺便生縛數十百人賊不敢入後應察罕特穆爾聘說以據上黨翼京師屯磁邢以次剪滅羣盜皆如其策明洪武中考正禮樂惟馨在召中事竣辭歸復召以老病解許之守其先世雄山書院建萬松亭知非齋可已堂一時耆宿如宋濂陶凱輩嘉其高尚連章贈別海門翟莊亦有詩贈之著有知非齋稿一卷及宋遼金正統論孫通仕明爲夏津主簿曾孫誠義民素貢士授嵩縣知縣八世孫策任寶豐主簿能詩有睡庵集十一世孫曰章舉人章誠字友道潞州人授兵部主事累官戶部尙書以公嚴稱

出爲山東行省參政進右丞致仕歸與尙書李惟馨解元杜

敷結社唱和人稱雄山三老其子孫衣冠鼎盛一時

以上諸安府

梁瑛汾州平遙人金大理評事秉鈞子也孝友正直醇儉有大志善騎射勇力絕人金末元兵南下瑛率眾詣軍門上謁授元帥左監軍屢出奇計入關定秦隴陞行都元帥以縣行平安州事安集勞徠人獲甯息武仙陷平陽瑛進兵仙大敗棄城走入覲授御前千戶扈從南征鳳翔西和興元數城俱下次唐鄧與金兵戰於三峰山大破之時軍民降附日眾他將以糧不給謀盡殺之瑛曰殺降不祥凡隸麾下悉得不死從元帥塔海甘布入蜀宋人守瞿塘兵不克進瑛作皮渾脫以濟塔奇之奏權征行萬戶留鎮興元又從圍資州踰月始下塔怒欲悉阬之瑛曰今始得一城而阬之他城未易下也

塔善其說瑛起行陳經百數十戰未嘗敗北所全活者亦不下數萬計成都平詔充西京平陽太原京北延安五路萬戶瑛以太原初定請給復三年詔從之尋卒年六十有六

梁天翔字飛卿瑛季子也少磊砢便騎射讀書能通大義以文階起年十八尹本縣平遙每召父老訪民間利病歲旱禱於超山獲大稔民勒石頌德中統五年制授懷孟路總管至元九年尹介休建學明農會南方騷動簡兵編戶以戍天翔第其穰寡甲乙無頗私焉知郢州州初附不逞之徒相聚爲盜嚴捕首惡餘釋不問授僉嶺南廣西道按察司事摘奸發伏郡邑以甯遷廣東道提刑按察副使改四川歲饑天翔請主者發米四萬斛賑之不及上聞謂報下民殍矣僧格秉政校天下錢穀天翔不事剝剝寬猛適中廉部南郡建言選良

撫臣以安八番授浙東海右雲南行御史臺侍御史乘傳上
二十餘條以聞皆切於當世之務世祖深嘉納焉授吏部侍
郎高麗饑以天翔往賑授成都路總管改四川道肅政廉訪
使年五十五卒追封安定郡侯子六時中進士信州路總管
治中時正大名路清河縣尹時仁僉浙東海右道廉訪司事
時義成紀縣尹時智時信

杜思明字彥昭汾州平遙人沁州長官豐長子隨父官沁州
遂家焉豐致仕思明襲爵悉遵父道中統新法舉立例遷隰
陝鄧三州刺史以嚴肅爲政人初憚其過剛旣而盜賊屏跡
奸胥畏威則又無不愛悅至元丙子從丞相巴延本作伯顏伐宋
命攻陽羅堡奮勇先登士卒踴躍遂克之授明威將軍吉州
路總管達魯噶齊請告歸卒年六十四子淵長甯州知州

山西通志卷一百一十七 忠貞堂
杜思忠字信甫豐次子沁州諸軍與魯長官會高麗金令公
作亂詔思忠討之宣以仁義片言折服凱還授承務郎淇陽
固鎮鐵冶提舉思忠曰鹽鐵之政古人所鄙營利之術非余
之能辭官歸人稱其高節

杜思敬字亨甫思忠弟也受學許魯齋之門由鎮撫累遷泊
書侍御史阿哈瑪敗臺臣以失言并逐世祖獨諒思敬涖職
如故出爲順德安西總管再入中臺爲侍御史議事當世祖
意拜中書參知政事改四川行省左丞疾不赴以中書左丞
致仕卒年八十六謚文定子肯構通奉大夫河東山西道宣
慰使贈康靖公肯播奉訓大夫會州知州肯獲資善大夫陝
西省左丞肯構子宣光祿大夫集賢殿大學士贈晉國公惠
承務郎龍游縣尹肯獲子文獻中奉大夫晉甯同知

呂沆字蒙甫汾州西河人少讀書曉達義理旣以國語文字爲廣平大名教授秩滿薦歷江南諸道行御史臺監察御史首上疏條八事紬貪懦之吏弭蜀寇之兵天歷初由南臺都御史僉海北海南道廉訪司使所至興學校正風俗斷疑獄弭盜寇詔加亞中大夫丁父憂服除起爲襄陽總管政績甚著授大中大夫大明路總管以臺議宿望擢拜嘉議大夫海北海南道肅政廉訪使卒於官贈禮部尙書封河東郡侯諡簡肅

鈕克讓介休人父文敦德樂義善教子克讓始歷岳州武昌二郡推官用法平恕守龍陽郡多善政州人勒石頌之終宣慰副使追封汾陽郡伯

褚不華字君實石樓人沆默有器局泰定初以廷試第二補

中瑞司驛使授海道副千戶轉嘉興路治中連拜南臺西臺御史遷河西道廉訪僉事移淮東未幾擢副使汝潁盜發勢張甚不華行郡至淮安極力爲守禦計賊至多所斬獲且請知樞密院老章判官劉甲守韓信城相犄角爲聲援復上章劾總兵及諸將逗撓之罪朝廷錄其功升廉訪使甲與賊戰輒勝賊憚之號曰劉鐵頭不華頗賴之總兵者聞不華効已益忿嫉乃檄甲別將兵擊賊冀以困不華甲去韓信城陷旣而天長青軍叛布延特穆爾所統黃軍亦叛賊皆挾之來攻不華知事危退入哈刺營賊稍引去乃出抵楊村橋賊奄至不華以餘兵入淮安時城之東西南三面皆賊惟北門通沐陽阻赤鯉湖指揮使魏岳陽逼駐兵沐陽淮安倚其芻餉而赤鯉湖爲賊據沐陽之路又絕賊計孤城可取進柵南鎖橋

不華與元帥張存義出大西門會僉事忽都布哈兵突賊棚
殊死戰賊敗走追北二十餘里城中食且絕元帥吳德琇運
糧萬斛入河爲賊所掠德琇儘以身免賊與青軍攻圍日益
急總兵屯下邳相去五百里按兵不出凡遣使十九輩告急
皆不聽城中食草木螺蛤魚蛙燕烏又韉皮鞍韉革箱敗弓
之筋皆盡撤屋爲薪人多露處街坊生荆棘至正十六年十
月乙丑城陷不華據西門力鬪中傷見執爲賊所衛子伴哥
冒刃救護亦被殺不華守淮安五年殆數十百戰精忠大節
人比之張許朝廷聞之贈翰林學士承旨榮祿大夫柱國追
封衛國公謚曰忠肅賻鈔二百錠以恤其家

以上汾州府

郝經字伯常澤州陵川人天挺之孫也金末避地魯山居民
匿窖中亂兵縱火經母許亦死經時九歲以密和寒菹汁挾

母齒飲之卽蘇後徙順天晝則負薪米養母夜則讀書嘗自
誦曰不學無用學不讀非聖書守帥張柔買輔延之爲上客
憲宗二年世祖以太弟開府金蓮川徵經入詔以治國安民
之道與語大悅遂留王府時憲宗入蜀命太弟統東師經從
至濊上言古之一天下者以德不以力宋今未有敗亡之釁
我乃空國而出諸侯窺伺於內小民凋敝於外經見其危未
見其利不如修德布惠結盟飭備以待西師則上應天心下
繫人望順時而動宋不足圖也會設江海荆湖南北路宣撫
使命經爲副先至江上宣布恩信招納降附聞蜀師久無功
進東師議及會兵渡江圍鄂州聞台州計復進班師議會宋
相賈似道密遣使乞和迺班師明年世祖卽位以經爲翰林
侍讀學士充國信使使宋告卽位且尋盟經入辭進立政議

時經有重名平章王文統忌之陰屬李璫潛師侵宋欲假手書經經之濟南璫遣書止經經以璫書聞於朝行至宿州遣使請入國期不報時似道方冒鄂功恐經至泄其情遂以李璫爲辭拘之眞州經上表於宋曰願附魯連之義排難解紛豈如唐儉之徒款兵誤國又數上書宋帝似道匿不以聞驛吏棘垣鎗戶經不爲動從者四十騎居七年死過半經獨與六人處眞州揚子院宋令伴使朱寶臣僞報元席捲北回經厲聲曰此事斷無有設有之當遣我輩還國又九年丞相巴延伐宋遣中都哈雅及經弟庸入宋問執行人之罪宋懼遣總管段佑送經歸道病勅尙醫近侍迎勞賞賚有差明年夏始詣闕入見秋卒諡文忠經被留十六年鑄錮急迫益肆力於文章所撰有易象春秋外傳續後漢書陵川文集共數百

卷經還之歲汴民射鴈金明池得繫帛詩云霜落風高恣所
如歸期回首是春初上林天子授弓繳窮海羣臣有帛書後
題中統十五年九月一日放鴈獲者勿殺國信大使郝經書
輟耕錄曰是時南北隔絕不知中統之改至元也帝聞之惻
然曰四十騎留江南曾無一人鴈比者其後帛書存祕監
鄭鼎澤州陽城人幼讀書曉大義不妄言笑既長驍勇善騎
射爲澤潞遠沁千戶甲午從征蜀屢立戰功宋將燒棧道圍
興元鼎修復之破宋兵解興元圍乙巳遷陽城縣軍民長官
庚戌從憲宗征大理自六盤山下南蕃諸城抵雪山舍騎徒
步嘗背負憲宗以行敵據險鼎奮身力戰至金沙河上臨水
傍危石立馬鼎諫曰此非所宜親扶下馬攻大理城禽其王
師還居役道經吐蕃全軍而歸賜名也可拔都從世祖南攻

大勝關破之繼破臺山寨擒守將乘勝獨進陷淖伏出鼎奮擊殺三人餘眾遁去南渡國鄂州別攻興國俱力戰中統元年以功遷平陽太原兩路萬戶二年成厲門關隘遷河東南北兩路宣撫使三年改平陽太原宣慰使至元三年遷平陽路總管歲大旱下車而雨導汾渠開陂黃嶺道建橫澗橋修學校厲風俗民德之十二年鎮黃川十四年改湖北道宣慰使移鎮鄂州夏五月討蕲黃二州寇戰於樊口舟覆溺年六十三贈中書丞謚忠毅加贈宣忠保節功臣平章政事柱國追封潞國公謚忠肅

鄭制宜鼎子性聰敏莊重有器局通習國語至元十四年襲父職戍鄂州攝府事十九年造樓船何家洲洲地狹眾欲徙旁居民制宜改授寬地民德之城中多姦或請捕制宜曰吾

但嚴守備而已奈何盜及無辜有數男子自城外至命縛入獄行省疑其非盜將釋之不從次日復有乘白馬來者叱下訊之首伏罪一郡帖然從征乃顏以功授懷遠大將軍樞密院判官遷湖廣行省參知政事賜白金五千兩尋徵拜內臺侍御史安西有牧地閼人奪民田十萬餘頃奉詔往訊按圖籍正之除湖廣行樞密副使昭賀二州及廬陵境常被寇害制宜率偏師徇二州獲首賊及其黨殺之盜賊屏息元貞元年授大都留守領少府監兼武衛親軍都指揮使知屯田事成宗眷遇殊厚每侍宴輒不敢飲屢賜內醢輒持以奉母特封母蘇氏爲潞國太夫人卒年四十七贈推忠贊治功臣銀青榮祿大夫平章政事追封澤國公謚忠宣子阿爾思蘭嗣段直澤州人元初兵亂直倡義固守一方世祖命爲本州長

官境內以甯復改建廟學陶育士人多推重之

張寶高平人中統間爲永興路百戶適江寇爲亂寶督兵檄至卽束擔以行時方元旦不少濡滯擒渠魁以歸遷都指揮僉事居家孝親修建甯文館教里中子弟

賈魯字友恒高平人兩以明經領鄉貢泰定初授東平路教授除太醫院都事召爲宋史局官遷中書省檢校上言八河倉淪沒官糧百三十萬斛其弊由富民兼并貧民流亡宜先正經界俄拜監察御史首言封事宜專達聖聰不宜臺臣先可否時論雖之已由山北廉訪副使入爲工部郎中至正四年河決特立行都水監於鄆城以魯爲太監魯循河道察地形往復數千里備得要害爲圖上二策其一議修築北隄以制橫潰則用工省其一議疏塞並舉挽河使東行復故道其

工數倍會遷中書右司郎中議未竟尋調都漕運使條奏漕政八事一京畿和羅二優恤漕司舊領漕戶三接運委官四通州總治豫定委官五船戶困於壩夫海運壞於壩戶六疏濬運河七臨清運糧萬戶府當隸漕司八宣忠船戶宜付本司節制不果行及托克托復相集廷臣議河防或言築堤或言疏南河遣工部尙書成遵行視終莫決魯昌言必塞北河使復故道役不大興害不能已復以前二策進丞相取其後策與魯定議召入奏大稱旨十一年春命爲工部尙書總治河防使領河南北諸路軍民發汴梁大名十三路民丁十五萬廬州等戍十八翼軍二萬供役一切從事大小軍民官咸聽節度便宜興繕仍命以兵銀之自黃陵岡南達白茅放於黃固哈只等口又自黃陵西至陽青村合於故道凡二百八

十里有奇自四月鳩工七月鑿河成乃塞決河九月舟楫通十一月諸埽隄成浚河復故道南漚於淮又東入海召還朝以河平圖獻超授集賢大學士勅翰林學士承旨歐陽元製河平碑以紀其績且宣付史館元既爲碑文又從魯訪問方略更質吏牘作至正河防記尋拜中書省左丞十三年從平徐州歸托克托命分攻濠州魯督戰誓師曰吾奉命統入衛軍頓兵於濠七日矣爾諸將同心協力必以今日取城池然後食急策馬麾進忽頭眩卒有旨護柩還高平賜交鈔五百錠給葬事

宋翼澤州人以茂異舉初官永甯簿政肅刑簡至治二年擢翰林學士改御史豪右斂跡諸所條陳多稱旨嘉納還淮西道廉訪使

以上澤州府

雷膺字彥正渾源人父洲金御史膺生七歲而孤篤志於學
太宗時詔設科選試膺甫弱冠得與選遂以文學稱史天澤
辟掌書記中統初授大名路宣撫司員外郎至元中拜監察
御史首以正君心正朝廷百官爲言且斥聚斂之臣不宜作
相出爲山西道僉事轉山南湖北道副使時江南新附諸將
利俘獲或強籍新民以爲奴隸膺出令得還爲民者凡數千
計後以母憂去官服闋起浙西道按察使時蘇湖多雨傷稼
百姓艱食請發廩米二十萬石振之行省議存三之一膺曰
宣布皇澤惠養困窮臣職也豈可效有司出納之吝邪省官
不能奪年六十二致仕成宗召諸故老議政膺爲稱首延見
便殿賜白玉帶環大德元年卒追封馮朔郡公諡文穆子肇
順德路總管府判官

趙璧字寶仁雲中懷仁人世祖爲太弟時召見呼秀才而不
名賜三僮給薪水命後宮親製衣衣之令馳驛聘名士王弼
等又令蒙古生十人從授書且敕璧習國語譯大學衍義時
從馬上聽之辭旨明貫輒大喜憲宗嘗問曰天下何如而治
對曰請先誅近侍之不善者憲宗不悅璧退太弟曰秀才渾
身是膽也斷事官尹羅幹齊本作牙老瓦赤持印上請時璧侍傍呵
之曰用汝與否尙須聖裁乃敢以印爲請奪其印置帝前帝
默然久之曰朕亦不能爲此其人竟不復用王子出爲河南
經略使劉萬戶貪淫其黨董主簿強取民女三十餘人璧按
其罪立斬之盡還民女劉大驚會雨雪上賀璧曰如董主簿
者尙不乏人俟盡誅之瑞應將大至矣劉悸死世祖卽位拜
中書平章政事從哈必齊討李璫璧得粟及羊豕饋軍軍聲

大振帝欲爲文檄宋冀數易皆不稱旨召璧爲之文成帝喜

曰惟秀才曲盡我意改樞密副使命詣都元帥阿珠

木作軍

同行漢軍都元帥事宋將夏貴自武昌援襄陽時漢水暴漲

璧據險設伏以待貴中夜潛上璧策馬出鹿門山行二十餘

里伏發奪其五舟及旦阿珠領騎兵璧率水軍合戰於虎尾

洲貴大敗走尋召還改中書左丞高麗王王植爲林衍所逐

命同國王頭輦哥行東京等路中書省事聚兵平壤璧議曰

高麗遷居江華島外雖卑詞臣貢內恃其險故權臣無所畏

忌擅逐其王今衍已死王實無罪若遣兵護歸使復國於古

京可以安兵息民策之上也帝從之師還復拜平章政事卒

諡忠亮

張從儉大同人延祐中爲榆次令有異政邑中耆老立碑記

之以上大
同府

崔斌字仲文馬邑人性警敏多智慮世祖命舉漢人議治體
者安圖以斌對入見陳時政得失直指面斥無所諱從幸上
都帝問爲治當何先斌曰致治之道在任相帝問誰可者斌
以安圖史天澤對又請乞采輿論乃立馬殿言曰有旨問安
圖可爲相否眾歡呼上悅遂以二人並爲相除斌左右司郎
中每論事帝前羣言終日不決者數語立判凡所獻替雖近
臣多不得與聞以此人多忌之會阿哈瑪立制國用司斌屢
斥其姦惡至元四年出守東平南征卒奪民席投其嬰於地
以死斌馳謂主將曰未至敵境而先殺吾民國有常刑汝亦
當坐遂下其卒於獄尋遷河南行省事奏劾右丞阿里妄冒
軍數杖遣之有旨籍兵二萬益襄樊斌奏河南戶少而調度

繁多實不堪命獲減其半改湖南行省參政國潭州阿爾哈
雅中流矢弑挾盾先登語諸將曰潭人破膽矣若斂兵許其
降則重湖以南連城數十可傳檄定也儻縱兵急攻使無噍
類得一空城何益卽遣人招諭城中爭出降遷行省左丞召
入覲從至上都上問江南治否弑陳治安之道因言阿哈瑪
身爲平章而子若姪或爲行省參政或爲體部尙書或領將
作監會同館一門悉處津要無以示天下公詔並黜之又言
阿喇卜丹本作阿老瓦丁臺臣劾其侵欺官錢今復授江淮參政恐
不厭人望上止其行復令御史臺樞密院按問汰冗員黜親
黨罷權茶營田漕運諸司海內無不稱快調江淮左丞凡前
竄國漁民不法事悉加釐正阿哈瑪慮其害已乃奏理算江
淮錢穀遮留使不獲上見誣搆以罪竟殺之天下訟其冤至

大初追封鄭國公諡忠毅

府平

梁宇遼州人爲榆社丞歷仕趙城汾西太原簿徐溝尹擊強治奸廉能有聲治行爲諸縣最陞雲南行臺御史整肅百僚雖奸吏毀謗日至不少挫轉四川肅政廉訪司事舉賢良遇奸黨審究抑肅風化凡按治所經不憚艱險瘴毒蜀人壯之趙國寶沁州人父全歸太祖下眞定諸郡擢副元帥安撫沁州卒王子詔有功於國者錄其子國寶襲同知沁州事歷尹洪洞襄陵潞陽諸縣時大軍攻襄樊供給軍需無虛日國寶指揮立辦民不怨嗟詔授陝州知州兼管勸農事秩滿歸每戒諸子曰吾雖武弁而性嗜經史汝輩讀聖人書學聖人道精思力行勿致面牆之悔至元二十四年卒年六十九贈衛輝路總管輕車都尉追封天水郡侯

以上遼
沁二州

聶瑋字廷器平定人少孤從兄瑋學初授招撫司副使同都元帥王瑋招撫平定諸州瑋死代爲元帥瑋弟貴副之貴素驕恣珪稍加檢制貴不平潛結金將武仙以叛遣力士刺珪遇救得免奔太原都行省恆察遣惑里根合老討武仙以珪爲前驅襲破仙於石人寨進攻克之以功授平定等處都元帥任賢使能各盡其長行省嘉其績予金虎符珪性寬厚雖讎怨亦容之喜賓客耽吟詠多購古今書畫與元遺山李敬齋王青峯友善卒贈西陽郡公子大本有學行平江路治中陳玉孟人父纖仕金以功授汾西帥卒及武仙之亂玉惻然曰軍民何罪而陷於死地正丈夫用命之秋遂捐軀濟難奮勇而前保於東山主帥嘉之承制賜金牌授龍虎衛上將軍防禦使弟珽果敢有謀善騎射亦授監軍使

杜安孟人少有謀畧從世祖累立戰功授龍虎衛指揮使後擢鎮遠大將軍值南蠻叛遣安討之不戰而平

傅顏平定人至元間爲安邱簿陞本縣尹歲饑捐俸振恤富室感動悉願出粟以裨仁政部使者奏顏五課悉最升上都留守司斷事轉工部主事累遷瑞州路總管毀淫祠變惡俗禁黠兵善政最著至正間應詔上封事數千言反覆以恤民爲說上欲大用之忽疾卒

呂思誠字仲實平定人父允漢中廉訪司僉事生而目有神光見者異之以國子生登泰定元年進士授脩縣尹每歲春行田間樹畜勤者賞以農器人爭趨事印識文簿卑社長凡不孝弟不事生業者悉書之罰其輸作天旱道士持青蛇曰盧師谷小青龍也禱之卽雨思誠以其惑眾殺蛇逐道士雨

亦隨至縣多淫祠悉命毀之尋擢翰林院國史編修官文宗
取閱國史院長貳無敢言思誠獨爭之事得已順帝初拜監
察御史劾奏平章撤爾特穆爾不宜首罷科舉疏留中思誠
納印綬殿前遂出僉廣西廉訪司事後移浙江達識特穆爾
爲南臺御史喉思誠劾江浙省臣謝曰吾爲天子耳目不爲
臺臣鷹犬也入爲侍御史厯待講學士兼國子祭酒出爲湖
廣參政諸生抗疏留之不得尋入中書參知政事拜左丞知
經筵事兼國子祭酒賜玉帶帝眷倍篤御史大夫納麟誣參
政孔思立受賕事或欲連中之納麟曰呂中丞素有廉聲難
以相及議造至正交鈔語尤深切御史承風旨劾狂妄奪其
誥命並所賜玉帶左遷湖廣左丞追遺之思誠不爲動時武
昌方爲賊據思誠抵城下語諸將曰賊與諸君相持久必不

知吾來出不意可以入城賊倉卒無備果盡驚走思誠遂入大會軍民官吏曰賊去示吾弱也規將復來於是申號令備器械葺城郭先謀自守徐議出征苗軍暴橫正色叱之不敢動尋召還復爲中書左丞思誠去二日城復陷至正十五年又罷歸卒贈齊國公謚忠肅思誠三爲祭酒諸生從化後多爲名士嘗總裁宋遼金三史著有介軒集及兩漢通紀正學舉要諸書

以上平定州

許楫字公度忻州人幼從元好問學年十五中詞賦科又舉賢良方正許衡深器重之爲勸農副使開屯田數千頃後提刑嶺北湖南辦富民賂佃代死者改江西活俘民六百口擢徽州總管飢民柯三八等爲寇行省驛召楫撫諭降之

王廷佐字輔臣靜樂人其先出自太原垂髫讀書輒有四方

志長工書法任江南浙西道監察御史彈劾不避權貴性明
敏能燭幽隱白冤抑轉僉江北淮東道肅政廉訪司事務鎮
靜風紀振揚政事之暇手不釋卷

以上
忻州

薩都拉字天錫別號直齋本答失蠻氏祖薩拉布哈父傲拉
齊以世勲鎮雲代居雁門遂爲雁門人都拉幼岐嶷不羣長
愈穎敏徧結豪雋爲文詞雄健倜儻登泰定丁卯進士第除
鎮江司達嚕噶齊始至設闕闕制權衡俾市物者各得其平
歲大祲白大府發倉以振全活數十萬人職滿入爲翰林國
史院應奉文字後至元三年遷河北廉訪司經歷再擢翰林
應奉遭母憂去職服闋授江浙行省中書省郎中至正六年
進江南諸道行臺侍御史以彈劾權貴不法事左遷淮西北
道廉訪司經歷未幾致仕都拉爲詩最長於情流麗清婉爲

虞集張翥諸人推服性好游嘗寓居武林每風日晴美輒蹣
芒躡肩一杖掛瓢笠凡深巖邃密人迹罕至者無不窮其幽
勝至得意處必留題詠遇亂避地安慶登司空山太白臺歎
曰此老真山水精也遂結廬其下年八十餘卒有雁門集弟
野芝字天與官至江西建昌路總管野芝子仲禮登元統進
士授福建行中書省檢校子孫遂家於閩

劉會繁時人少慷慨有志節爲鄉里推重金貞祐中以縣殘
破改堅州興定丁丑元兵徇代及境會率鄉人歸命卽授堅
州判官遷都元帥兼節度使時喪亂之後城邑蒿萊庶事草
創公廨城樓橋梁之屬咸新爲之流亡之民漸復其業政績
甚著年七十五卒子澤襲職爲管民長官

王兆繁時人父宣好施喜賓客甚有名譽少補吏非所好棄

去從旁郡豪俠遊排難解紛不避強禦元兵及境金人棄城奔潰城中遺民共推兆與劉會同領堅州事乃率眾詣主帥款附授左監軍判官盡還先所俘人口邑賴以安累遷昭武將軍堅州左副元帥躬勤政務招集散亡勸課農桑在職二十餘年威惠布聞卒年八十四弟斌善騎射兆特爲爪牙金將武仙餘黨匿五臺山中爲盜賊捕其魁合境以安

韓仲彬堅州人至元間以明經舉知應州金城縣事爲政公平持身廉謹後同知堅州服官益虔以績最遷知代州

殷仲溫堅州人父珍有隱德州縣累辟不就仲溫廉慎膚敏起家奉宸副使有政績五遷朝列大夫僉中書院事

皇甫德崱州人丰采奇偉穆呼哩器之延諮時務德議論英發拜信威將軍本州觀察判官行元帥府事扇仁風鋤強梗

興學校勸農桑民以良牧稱之

劉好德崞州人幼聰明德學昭著仕爲高平尹縣久凋殘民

多流移好德撫安復業興學育才士風丕變

以上代州

狄琮字子玉保德人軀幹魁梧尙氣節有并州豪傑風讀書

了大義慨然以功名爲志辭親詣京識者薦其名于裕宗宿

衛晉王至元庚寅王封梁開藩雲南播奉議大夫王府司馬

府中事咸諮之王改封晉鎮邊西陲荆內史府轉朝列大夫

內史府司馬暇則講貫經訓凡諷諫必盡忠王每嘉納未幾

進大中大夫知無不言大德辛丑王薨哭之慟至嘔血曰吾

尙可以生乎癸卯召子東山諭之曰爲人臣子惟忠與孝爾

其勿違言訖梁棟間有聲如磬視之逝矣子東山爲人倜儻

不羈善繼先志剛正明達有爲有守初仕中書舍人進監察

御史出爲同知大都路都總管以材選授中書禮部郎中進

大中大夫同僉宣徽院事

保德州

察罕西域拔勒紇城人父伯德那徙解州察罕生而魁偉穎

悟博覽強記通諸國字書爲行軍府鄂羅千戶前後從鄂羅

齊

本作奧
魯赤

出入湖廣江西兩省多著勲績大德四年中書省

奏爲武昌路治中丞相哈刺哈曰察罕廉潔固宜居風憲然

武昌大郡非斯人不可竟除武昌後治廣西高仙道之黨以

數千計止誅其首惡數人餘悉宥之焚其籍事武宗仁宗定

大計多所匡益拜中書參知政事總綱維不屑細務識者謂

得大臣體進榮祿大夫平章政事暮年居德安白雲山別墅

以白雲自號嘗入見帝稱爲白雲先生而不名賜姓白氏罕

天性孝友縱奴爲民人稱長者子外家奴大中大夫武岡路

總管忽都圖奉直郎高郵府判官孫九人仕者二人闊布哈

哈撒州

姚天福字君祥絳州人後徙鴈門讀春秋通大義辟懷仁丞至元五年始立御史臺以天福爲架閣管勾尋拜監察御史條奏宰相阿哈瑪罪二十有四召廷辨天福枚數之至於三氣沮色喪上曰此三者罪已在不宥因目天福曰巴爾斯臣下有違太祖之制干朕之紀者汝抨擊之母隱廷臣皆震悚巴爾斯者謂不畏强悍猶虎也帝仍加厚賜天福曰言臣分也受賞非分也卒不受按行畿輔時監敢普得罪御史按之不服天福廉得其死罪十有七俄以宥免經臺門大詬急捕之檢行囊得賄侍御史安兀失納救免狀明日陞奏上曰彼七死猶赦汝欲何爲天福對罪十有七條赦七留十餘誰歸

上悟戮敢普而斥安十二年罷按察司天福曰是司之設所以廣視聽虞非常慮至深遠不但繩有司已也大夫王昔特穆爾駭曰微公言幾失之夜入帝臥內奏其言帝大悟詔復立阿哈瑪益不悅左遷衡州路同知不就後歷河東淮西湖北諸道按察使善辨疑獄大德四年拜參知政事大都路總管兼大興府尹六年卒年七十三

尉遲德誠字信甫絳州人祖天澤霍州御衣局人匠總管父鼎潞州知州德誠歷官太子率更丞至大元年改詹事院都事二年遷家令司丞仁宗以爲謹恪常賜酒帛得侍左右數薦士出則未嘗語人廳事前有栗苗不種而萌偶出一莖雙穗眾以爲嘉禾陞家令四年選爲河東山西道宣慰司同知擊姦吏寬稅斂上計入見上方食撤餘以賜擢工部尙書尋

改陝西行臺治書侍御史延祐元年遷京畿都漕運使二年
拜遼東道肅政廉訪使上疏言事曰勞諸王以懷其心防出
人以嚴宮禁立諫官以遠讒佞崇科舉以求人材立常平以
備荒年汰僧道以寬民力舉賢良以勵忠孝抑奢侈以厚風
俗及拯鈔法裁冗官等事未報卒年五十三

張仲儀字伯威絳州人以大官薦由絳學正累遷杭州路總
管府判官上下稱能吏海甯潮溢沒民田廬仲儀禱于海神
水隨退遷江西行中書省左右司都使歲饑民將爲變仲儀
單騎出撫之民咸泣散去言于省臣發粟振濟陞撫州路總
管卒年六十九

劉慶河津人從國兵祖征鳳翔下河中遇里人陷爲奴者贖
之並釋所俘軍民因董正鄉甯營屯兼領縣事歷七載民稱

便改河津丞遷知吉州時徵發紛繁不忍民受其累有惠政以起瘡痍從軍臨民歷四十年才猷卓著

以上絳州

賀仁傑永和人貢子少入宿衛世祖召之出白金曰此汝父六盤所獻者聞汝母來可持歸養母辭不許乃歸白母盡散之宗族會上都留守關上顧仁傑曰無以易卿盧世榮僧格秉政不肯爲之下僧格欲陰中之累數十奏上不聽大德九年請老歸卒仁傑妻劉氏早歿上欲爲娶貴族固辭乃娶民間女已而喪明夫妻相敬如賓

賀勝字正卿小字伯顏仁傑子能日馳千里年十六入宿衛凝重寡言大臣有密奏獨留勝許聽之出則參乘輿入則侍幃幄非休沐不得至家時四方以遽聞者上亟欲賜報凡使事輒見遣受命無留行復命無後期遠至六詔交廣西域之

屬無不至計所歷無慮數十萬里上親征乃顏勝直武帳
傳密旨飭諸將還侍側飛矢交帳前獨立不動及還都勝參
乘伶人蒙采毳作獅子舞迎駕與象驚奔逸不可制勝投身
當象前令後至者斷勒縱象乘輿乃安上親撫其創造尙醫
尙食視護已拜集賢學士僧格敗上問誰可相者勝曰天下
公論皆屬完澤遂相完澤而以勝參知政事大德九年代父
仁傑爲上都留守兼開平府尹既至通商賈謹出納權貴子
弟暴橫者悉繩以法至大三年進中書左丞相行留守如故
歲饑輒發廩振民仍自劾待罪上報曰祖宗以上都之民付
卿父子欲安之也卿能如此朕復何憂民德之爲立祠西門
外上復命工寫其像以賜俾傳示子孫尋以足疾請老不許
曰卿臥理足矣賜小車出入禁闕初開平人張弼家富奴索

錢民家毆負錢者至死治獄者教奴引弼子丞相特穆德爾受其賄六萬緡屬勝出奴勝不從丞相坐都堂召留守將罪之勝昌言大奴所干非法不敢從他實無罪御史中丞楊多爾濟本作朵兒只平章蕭拜珠使御史徐元素按弼子賄得實入奏詔連問及特穆德爾復相卽繫多爾濟拜珠戮於市且誣勝乘賜車迎詔大不敬并殺之泰定初詔雪其冤追封秦國公諡惠愍子太平

賀太平本名惟一字允中勝子勝寬雪襲虎賁親軍都指揮使元統初累遷御史中丞御史劾中書參議佛家閭時宰庇之惟一辭疾去至正二年詔起中書參知政事辭進右丞又辭會佛家閭黜乃起就職請均給宗室諸王歲賜選臺閣名臣充守令覈其治行時票貴而金銀賤請委官收市所得不

賁後兵興卒獲其尸六年拜御史大夫故事臺端非國姓不
授特賜蒙古氏更曰太平七年遷中書平章政事國王多爾
濟居政府復薦爲左丞相請勒僧道有妻子者爲民給校官
俸賜經筵官坐選清望官專典陳言立行都水監治黃河舉
隱士董立張樞李孝光等太平雅好訪人材南北士必錄於
冊至是多進用之初故相托克托出居西甯州力請令歸葬
父曰托克托大義滅親今父沒而不克奔訃爲善者懼矣托
克托還因讒間成隙斥中書參政孔思立等胥太平所拔用
者也九年罷太平爲翰林學士承旨御史誣劾其過并論其
子額森胡土克圖太平曰吾無罪但當聽命於天遂歸杜門
謝客以書史自適家居六年起爲淮南行省左丞相兼知行
院事總制諸軍駐濟甯命有司給牛具種麥自濟甯達海州

兵賴以濟尋調遼陽行省糴粟以給都城處置有法十七年復召拜中書左丞相而右丞相虛位元漢人任首輔者獨太平而已略柳林或勸遷都太平持不可徵同知樞密院劉哈刺布哈於彰德引兵擊敗賊又訪求死節士雖布衣亦加贈謚有官者就官其子孫人尤感動右丞相搠思監家人造僞鈔力解之曰安有堂堂宰相而爲此者會奇后希子早臨政遣宦者朴布哈諭意太平不答已又召至宮舉酒申前意復依違以出而后黨御史遷他官疑額森胡土克圖泄其事去太平意益決御史賈珠僧格實理乃先劾左丞成遵參政趙中以二人太平黨也太平知勢不可留數辭位二十年拜太保俸養疾於家會陽翟王阿魯威特穆爾亂起爲上都留守太平毅然往額森胡土克圖故將托懽引兵縛陽翟王太平

生致闕下終不爲已功尋拜太傅賜歸時伯撒里命爲右丞相辭曰若必命臣非得太平同事不可密旨令母行太平至沙井少留御史大夫布哈劾之詔拘宣命及賜物搠思監更誣奏之安置吐番尋遣使至東勝逼令自殺

額森胡土克圖名均字公秉太平子少好學累遷翰林侍讀學士太平爲相務廣延才彥而額森以丞相子又傾已下士以故名稱籍甚已而被劾罷從父還及父再相授知樞密院事至正十九年命往討開平盜太平以其年少數請改命不允至則遣將復懿州省治盜東奔尋罷爲上都留守搠思監誣老的沙額森及托懽等不軌執托懽鍛鍊額森當貶撒思加之地留居朶思麻被杖卒

王克敬字叔能大甯人幼奇穎大甯在晉西鄙習尚少文克

敬獨孜孜爲儒者事初仕江浙左右司都事監倭互市悉屏
兵衛撫以恩信番帖然無敢譁鄱陽總管王都中出廩粟振
饑行省欲罪之克敬曰饑距此千里比待命民且死彼爲仁
而吾屬顧不仁邪遂得免延祐中拜監察御史監吏部選有
履歷當升而過輕者卒升之治書侍御史張伯高曰監選以
減駁爲能今王御史務崇寬厚可爲世道賀矣會議中書堂
首言江南包銀民貧不能輸者有司責之役戶當罷兩浙煎
鹽戶役重當免其它役從之泰定初出爲紹興路總管抽分
海舶勘番者例籍其貨克敬曰某貨出某國地有遠近貨有
輕重冒重險出萬死舍近而趨遠棄重而取輕豈人情邪遂
罷籍轉兩浙鹽運使令私鹽毋得連逮婦人著爲令俄調海
道漕運都萬戶天歷之變直沽漕舟多復漕而南行省欲坐

罪克敬謂蹈萬死完所漕而還非得已乃請令附次年漕舟
達京擢參議中書省事除南臺治書侍御史以正綱紀爲已
任不阿宗戚聲譽益著元統初出爲江浙參政松江大姓巖
漕米萬石入京後子孫貧有司仍雜置民賦克敬曰匹夫妄
獻米微名爵今身死家破豈可使一郡均其害奏免之尋請
老謂人曰穴趾而峻墉必危再實之木必傷其根無功德而
忝富貴何以異此又曰世俗喜言勿認真此非名言臨事不
認真豈盡忠之道故歷官政績胥可紀時稱名卿雅喜誦讀
有得輒手鈔爲書著有詩文奏議卒封梁郡公諡文肅以上
程思廉字介甫家東勝州父恒沿邊監權規運使思廉用薦
給事東宮授樞密院監印使任襄樊轉餉築城置倉轉輸者
多與民爭門不時至令行旅異路粟至多露積一夕大雨思

廉安臥不起省中召詰答曰此去敵近中夜騷動眾必驚或致他變縱有漂濕不過軍中一日糧耳聞者矐之至元十二年入爲監察御史以劾阿哈瑪繫獄居之泰然累遷河南道副使聞兩河饑而急徵租欲緩之有司謂法當上請思廉曰必待請民且不堪命矣卽移文罷徵後果得請旣而流民數萬渡河求食朝廷遣使禁勿渡思廉慮其生變曰民急就食豈得已哉天下一家河南河北皆吾民也悉縱之往且曰雖得罪無憾章上亦不之罪衛輝懷孟大水及城不沒者數版思廉卽修隄防露宿督役水不爲患衛人德之以憂去初立雲南行臺起爲御史中丞渠長來賀意甚倨思廉宣上威德使毋自外聞者懾服雲南舊有學校力爲振起始有從學問禮者成宗初除河東山西廉訪使初下車請減太原飼諸王

駝馬數雖觸嫌怨不顧也卒得從減免諸訟民甚賴焉
平陽諸郡歲轉粟北方勞費數倍請改輸河東近倉舊法決
事有議劄權歸曹吏思廉自判牘尾某當某罪吏皆束手累
任風憲言事剴切如請早建儲貳訪求賢俊辨車服議封謚
養軍力定律令皆急務也而又見義勇爲剔弊除蠹不少回
護與人交有終始疾病死喪往返數百里爲之經紀好薦達
人或以爲好名思廉曰若避好名之嫌人不復敢爲善矣卒
謚敬肅

趙世延字子敬本雍古氏居雲中北邊祖按竺邈從太祖征
伐歷功爲征行大元帥鎮蜀因家成都父黑梓襲兼文州吐
番萬戶府達嚕噶齊世延幼喜讀書弱冠世祖召見俾習官
政至元二十六年擢監察御史劾丞相僧格不法中丞趙國

輔抑不上除南臺都事成宗時厯安西路總管前官壅滯三千牘至不三月剖決殆盡武宗初改四川廉訪使時蒙古軍士科差繁重而番戍往來多害人軍官或抑良爲奴世延皆除其弊又修都江堰遷西臺侍御史左丞劉深往討八百媳婦敗誅右丞阿忽台當繼行世延言蠻方惟事羈縻藉使盡得其地何補於國兵宜止弗用章再上事卒罷延祐初拜參知政事署仍居右居中書二十月遷御史中丞命平章以下送之入臺特穆伊德爾忌之用皇太后旨出爲雲南右丞帝命仍爲中丞世延劾特穆德爾罪惡十有三事乞補外授四川行省平章卽重慶路立屯田得江津巴縣閒田七百八十頃摘軍千二百人墾之歲得粟萬餘石英宗初持穆伊德爾復相下之獄世延不爲動左丞相拜珠屢言世延亡事得出

待穆伊德爾怒曰此左丞相罔上也帝曰此朕意耳泰定四年復召爲中書右丞詔以誣構狀示天下天歷初遷御史中丞用中丞崔彧故事加平章政事許乘小車入內尋以平章政事兼翰林學士承旨奎章閣大學士命修經世大典加封魯國公移疾歸屢徵不起後至元二年卒年七十七謚文忠世延厯事七朝敷厯省臺五十年爲文章波瀾浩瀚一根性理嘗較定律令彙次風憲宏綱行世

謝睦歡豐州豐縣人從太祖攻西京力戰先登連中三矢仆城下太宗見而憐之命軍校拔其矢縛牛剖其腸裹而納諸腹中良久乃甦誓以死報每遇敵必身先之官至太原路金銀鐵冶達嚕噶齊

謝仲溫睦歡子也豐頤廣頤聲皆洪亮略涉書史見世祖於

野狐嶺命備宿衛城上都以工部提領董其役大軍伐宋圍
郭令督將守江時軍士乏食仲溫教之罾魚人賴以飽中統
元年擢平陽太原兩路宣撫使二年改西京至元九年遷順
德路總管時方用兵有幣子以償轉輸之值者仲溫出俸金
贖還之十六年爲湖南宣慰使二十二年改淮東歲旱仲溫
導白水塘溉田公私賴焉大德六年卒年八十子蘭江州達
魯噶齊孫李完承事卽冀甯等路管民提司達魯噶齊

馬祖常字伯庸世爲雍古部居靖州之天山先世事金爲馬
步軍指揮使子孫因以馬爲氏曾祖月合乃憲宗命協理斷
事官事奏免儒人丁立常平倉多所建白從世祖南征掌饋
餉卒謚忠懿父潤同知漳州路總管府徙家光州祖常七歲
知學得錢卽市書十歲見燭欹燒屋解衣沃水以滅火叔嗟

異之既長從蜀儒張頴講道儀真質疑義頴甚器之延祐初鄉會試皆舉首廷試第二授應奉翰林文字擢監察御史上書請御正衙立朝儀使因建白一十五事英宗爲皇太子又請慎簡師傅時特穆伊德爾爲丞相盜觀國史率同官達爾瑪劾其十大罪仁宗震怒命解相位秦州山移言山本不動之物今而動焉由在野有當用不用之賢在官有當言不言之佞故有是異疏入大臣皆家居待罪亡何特穆伊德爾復相左遷開平尹欲陰中之乃退居光州久之特穆伊德爾死除翰林待制累遷禮部尙書兩知貢舉一爲讀卷官尋參議中書省事天歷中除南臺中丞元統初召議新政賜鈔萬貫遂拜御史中丞持憲益存大體西臺劾其僚禁酷時有酒客以苛細不問嘗言將家子弟多驕脆有事任使而庶民有挽

強蹶張老死草野者當建武科儲材以備非常之用格不行
尋轉樞密副使辭疾歸起行臺中丞皆不赴卒年六十封魏
郡公謚文貞嘗預修英宗實錄皇圖大訓承華事畧又編集
列后金鑑千秋記畧風憲宏綱以進受賜優渥文宗嘗駐蹕
龍虎臺應制賦詩尤被嘆賞謂中原碩儒云以上歸綬道

右元九十一人